



INFORME DA SECRETARÍA XERAL TÉCNICA SOBRE O "PROXECTO DE ORDE POLA QUE SE MODIFICA A ORDE DO 27 DE XUÑO DE 2022 POLA QUE SE CREA A REDE ENTRE O SECTOR PESQUEIRO E ORGANISMOS CIENTÍFICOS NA COMUNIDADE AUTÓNOMA DE GALICIA"

Visto o "Proxecto de orde pola que se modifica a Orde do 27 de xuño de 2022 pola que se crea a rede entre o sector pesqueiro e organismos científicos na Comunidade Autónoma de Galicia", en cumprimento do disposto no artigo 43.2 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, esta Secretaría Xeral Técnica emite o seguinte

INFORME:

I. FUNDAMENTACIÓN CONSTITUCIONAL, ESTATUTARIA E LEGAL

O artigo 148.1.11 da Constitución establece que as Comunidades Autónomas poderán asumir competencias en "materia de pesca en augas interiores, marisqueo e acuicultura". Por outra parte, o artigo 149.1.19 outorga ao Estado a competencia exclusiva sobre "a pesca marítima, sen prexuízo das competencias que na ordenación do sector se atribúan ás Comunidades Autónomas".

Sobre a base de tal fundamento constitucional, o Estatuto de Autonomía para Galicia establece que corresponde á Comunidade Autónoma galega a competencia exclusiva sobre "a pesca nas rías e demais augas interiores, o marisqueo e a acuicultura" (artigo 27.15), e





sobre "as confrarías de pescadores" (artigo 27.29); así como o desenvolvemento lexislativo e a execución da lexislación do Estado da materia "ordenación do sector pesqueiro" (artigo 28.5).

De acordo con este marco competencial, promulgouse a Lei 11/2008, do 3 de decembro, de pesca de Galicia, que persegue como fins, entre outros dos establecidos no seu artigo 2, potenciar a investigación, o desenvolvemento tecnolóxico e a innovación na pesca, no marisqueo e na acuicultura, así como fomentar a cooperación entre os científicos e o sector. Tamén o artigo 115 sinala que a consellería competente en materia de pesca promoverá e adoptará medidas para fomentar e realizar investigacións científicas e desenvolver tecnoloxías axeitadas no apoio da conservación e a ordenación dos recursos, mariños vivos, nos diferentes ámbitos de explotación e comercialización, mediante, entre outras actuacións, a promoción da cooperación entre as administracións públicas e os axentes económicos e sociais, nomeadamente as entidades asociativas do sector, e os centros de investigación.

Conforme o sinalado, mediante a Orde do 27 de xuño de 2022 creouse a Rede entre o sector pesqueiro e organismos científicos na Comunidade Autónoma de Galicia, coa finalidade de fomentar o intercambio e a transferencia de coñecementos entre os organismos científicos, o sector pesqueiro e a Administración pesqueira de Galicia, disposición que se pretende modificar mediante o presente proxecto normativo. Esta orde tivo xa unha primeira modificación mediante a Orde do 11 de setembro de 2024, coa finalidade de adaptala á nova normativa relativa ao Fondo Europeo Marítimo, de Pesca e de Acuicultura (FEMPA), no referido ás funcións da Presidencia, así como para incorporar ao Centro Tecnolóxico do Mar (Fundación CETMAR), como un novo organismo científico dentro da Rede.





II. XUSTIFICACIÓN DO PROXECTO

A Rede configúrase como un órgano colexiado, adscrito á Dirección Xeral de Desenvolvemento Pesqueiro, composto por unha presidencia, dous vicepresidencias e 17 vogalías en representación dos organismos científicos e do sector pesqueiro, por proposta das distintas organizacións ou institucións, das cales dúas corresponden a persoas investigadoras da Axencia Estatal Consello Superior de Investigacións Científicas, unha pertencente ao Instituto de Investigacións Mariñas e outra ao Instituto Español de Oceanografía.

O 18 de decembro de 2023 publicouse no *Boletín Oficial do Estado* a Resolución do 5 de decembro de 2023, da Presidencia da Axencia Estatal Consello Superior de Investigacións Científicas, sobre delegación de competencias. No seu apartado oitavo, referido á participación e representación institucional en entidades nacionais, delega na persoa titular da Vicepresidencia de Organización e Relacións Institucionais, entre outras competencias, as relativas á proposta, nomeamento o aceptación, segundo corresponda, de representantes do CSIC en comisións de seguimento de convenios e de encomendas de xestión, así como en grupos de traballo, comités, comisións, padroados, órganos reitores de Institutos Mixtos, plataformas, redes, asociacións, fundacións, consorcios, sociedades mercantís e calquera outra entidade pública o privada, de ámbito nacional, autonómico o local, na que participe o CSIC o na que deba de estar representado, excepto a designación de representantes recollida nos apartados 6.2 e 8.2 da referida resolución, e sempre que non estea previamente determinado o titular do órgano que deba exercer a representación do CSIC.

Esta circunstancia esixe modificar o punto 5º da letra d) do artigo 4.1 da Orde do 27 de xuño de 2022 no relativo á proposta de nomeamento





das persoas investigadoras do CSIC.

III. ESTRUCTURA E CONTIDO

Respecto á estrutura e contido do proxecto, consta dun preámbulo, no que se resaltan os obxectivos e finalidade pretendidos pola disposición normativa, e un artigo único, que identifica a orde modificada. Trátase dunha modificación simple que afecta a un único precepto, xa citado anteriormente. Completa o texto unha disposición derradeira, referida a súa publicación e entrada en vigor.

IV. TRÁMITES REALIZADOS E RESULTADO DOS MESMOS

A elaboración do presente proxecto levouse a cabo pola Dirección Xeral de Desenvolvemento Pesqueiro, centro directivo a quen lle corresponde, entre outras, as competencias relacionadas co fomento da organización sectorial e a investigación mariña, de conformidade co disposto no artigo 12 do Decreto 50/2021, do 11 de marzo, polo que se aproba a estrutura orgánica da Consellería do Mar.

Consta no expediente a memoria xustificativa sobre a súa legalidade, acerto e oportunidade; a memoria económico-financieira e o informe do Servizo de Técnico-Xurídico.

Unha vez rematada a fase inicial de elaboración, o texto aprobouse polo conselleiro do Mar como proxecto de orde, publicándose na páxina web do portal de Transparencia e Goberno aberto, de conformidade co disposto no artigo 9 da Lei 1/2016, do 18 de xaneiro, de transparencia e bo goberno, e co previsto no artigo 42.3 da Lei 16/2010, do 17 de decembro, de organización e funcionamento da Administración xeral e do sector





público autonómico de Galicia, durante o período comprendido entre o 27 de marzo e 16 de abril de 2025, tal como consta no certificado da

Dirección da Área de Administración Dixital da Axencia para a Modernización Tecnolóxica de Galicia do 24 de abril de 2025, sen que se recibiron suxestións ou observacións ao seu contido.

En cumprimento do trámite de audiencia, deuse traslado do texto do proxecto á Axencia Estatal Consello Superior de Investigacións Científicas, quen non realizou observacións ao seu contido.

Con data 31 de marzo de 2025, a subdirectora xeral de Promoción da Igualdade informou que, ao non constar que se trate dunha norma con repercusións en cuestións de xénero, non procede emitir o informe de impacto de xénero solicitado.

O proxecto tamén foi informado favorablemente pola Dirección Xeral de Orzamentos e Financiamento Autonómico da Consellería de Facenda e Administración Pública o 27 de marzo de 2025, ao ter encaixe nos escenarios orzamentarios.

Con data 16 de maio de 2025, o proxecto foi informado favorablemente pola Asesoría Xurídica ao consideralo conforme ao ordenamento xurídico, recolléndose as suxestións realizadas ao seu contido.

Visto o anterior, de acordo cos principios de boa regulación establecidos polo artigo 129 da Lei 39/2015, do 1 de outubro, do procedemento administrativo común das administracións públicas e, en particular, cos de necesidade, proporcionalidade e eficacia, esta norma contén a regulación imprescindible para atender a súa finalidade. Igualmente, en virtude do principio de seguridade xurídica, a norma garda coherencia co resto do ordenamento xurídico, e, en cumprimento do principio de transparencia, identifícanse con claridade nela os obxectivos





perseguidos. Ademais, durante a súa tramitación promoveuse a participación da cidadanía mediante os trámites de audiencia e

publicación no portal de Transparencia e Goberno aberto da Xunta de Galicia.

En consecuencia, tendo en conta os aspectos analizados, o texto proposto reúne os requisitos esixidos na normativa de aplicación examinada anteriormente, polo que esta Secretaría Xeral Técnica informa favorablemente o proxecto de orde.

Santiago de Compostela, na data da sinatura electrónica
A secretaria xeral técnica

Marta Barreiro Castro

